



Copyright © Jacqueline Smith 2021.

The right of Jacqueline Smith to be identified as the author of this work has been asserted by her in accordance with the Copyright, Designs and Patents Act, 1988.

All rights reserved. No part of this publication may be reproduced, stored, or transmitted in any form, or by any means electronic, mechanical or photocopying, recording or otherwise, without the express written permission of the author.



<http://bit.ly/wordsmith-jacqueline>

wordsmith.jacqueline@gmail.com

Janet Douglas frae the north, wha came wan day
cuidnae spake, but hir vice did make unco, orra soon.

A wutch she wisnae, thouch monie cried hir sae,
fir she tellt thon folk that the de'il wis hingin aroon.

She wavit her hauns an scribbit the groon,
says she, he's bidin at the Shaws an Polloktoon.

They wir craftin dolls; he shewit all he did know
about clay an wax wairm an saft,

tae form pictures o' wan that they bid woe;
stickin peens aboadie an chantin lik daft.

Wae the secund sicht Janet did warn

But still an on; she didnae burn.

~~~

Daith wis whit the de'il's crew wantit,  
Aye, tae kill the laird cause they thought him haird.

But the clay doll wis foon wae peens stuck in it  
cause the Privy Cooncil hid bin cried.

Sir George Maxwell wis lyin abed in payne  
till Dumbie gang tae find yon aim.

Guidwife Mathie says Dumbie hid it there,  
screechin lik hell she wisnae tae blame

an pittin hir in jile jist wisnae fair.

Still the Baillie tuik hir oot hir hame.

***Wae the secund sicht Janet did warn***

***But still an on; she didnae burn.***

~~~

Witnesses tae the doll comin oot the lum,
though she cuidnae use her tongue;

kent that Dumbie had bid them come,
sae wis seen tae be trew in her actions.

Mair warnins o' bad, then Mathie's young lad
wis ta'en wae his sister, a gie green lass.

Annabel suin tellt o' the baptisin she'd had
afore lyin abed wae a cauld black man, bold as brass.

The wutchpricker got naethin frae Mathie an crew
until Margery an Margaret confessit wae rue.

Wae the secund sicht Janet did warn

But still an on; she didnae burn.

~~~

Then the trial an the verdict wis tae hing them aw,  
the executions tuik place an the corbie flew

lik Dumbie, awa tae ither places,

findin pictures an peens, uncoverin suin  
anither dizzen wutches; but the Cooncil hid enough.

Tae Stirlin Tolbuith Janet wis ta'en,  
saw mair wutches bairns an she suin guessit,

that ootside the jile they wir playin,

tellin the baillie she kent they'd confessit  
that their mithers an faithers wir freens o' the de'il.

***Wae the secund sight Janet did warn***

***But still an on; she didnae burn.***

~~~

The baillie releasit hir when he heard hir say,
she wis worrit fir their blackenit souls.

He roondit them up that very day
ignorin the stushie o' upcasts an yowls.

Then the laird o' Barloch nearby, loast his sons
an Dumbie made mair o' hir signs
that there wir wutches still tae find.

Suin they wir lockit up fir fyve lang muins;
yon an their warlocks were caught in a bind,
an Dumbie hid gang richt suin.

***Wae the secund sicht Janet did warn
But still an on; she didnae burn.***

~~~

She got tae a place cried Dumbarton  
an mair wummen were quickly taken.

Aye, then ye cin guess whit did happen.

The wutchpricker wis blithely makin,  
his trade by spierin an stabbin,  
about de'ils and pacts, he said it wis facts.

Suin he had them aw greetin an gabbin  
an whit they tellt spellt daith fir them aw.

But Dumbie wisnae through,  
still claimin hir warnins spake trew.

***Wae the secund sicht Janet did warn  
But still an on; she didnae burn.***

~~~

But naebodie wis sure o' hir stories o' hell
wae hir spae that had broucht her sic fame.

She seemit sae much lik a wutch hersel,
so they lockit hir up again.

They scourgit Dumbie through Edinburgh's streets
afore lockin hir up in the jile.

But try as they might, hir words
when she tellt o' the folk frae that place,
still gied them aw fricht.

Suin tae Castlehill the baillies made haste.

***Wae the secund sicht Janet did warn
But still an on; she didnae burn.***

~~~

Some lairds an ladies she says,  
were makin their deals wae the de'il.

She wis wantin them in court that day  
tae repeat the Lord's prayer wae ill,  
sayin, 'thou wart' instead o' 'thou art.'

Nae part did they want tae play,  
an the lawyers, the judge, the baillie,  
decidit tae send Dumbie away.

Oan a ship she'd be gang raither than hang  
fir nae evidence cuid they find.

***Wae the secund sicht Janet did warn,  
But still an on; she didnae burn.***

~~~

There wis naethin tae hear,
nae maitter them spierin her mind.

Nane covenants did Dumbie fear,
frae de'ils wae cloven feet like a hind.

But Janet Douglas wis bound fir the plantin,
banishit tae faraway shores lik a loon
an niver tae Scotland agin returnin.

So it tuik time till a ship wis foon,

cause langbye, sailors wir aye niver kind
wae wummin or wutches aroon.

***Wae the secund sicht Janet did warn,
but still an on; she didnae burn.***